

Date – 23/02/2026

Time - 18:30 -18:40Hrs

## AKASHVANI AIZAWL

### REGIONAL NEWS BULLETIN

#### HEADLINES ( EVENING )

1. Vawiin Assembly thutkhawmah Sialkal Range Development Council Bill, 2026 chu Select committee-ah siamthat ngai te siamtha turin House-in a pass.
2. Kum 2024 chhunga vawk pul hri African Swine Fever (ASF) avanga vawk suatte zangnadawmna chu vawiin atangin semchhuah a ni.
3. Vawiin khan India mi zinga Governor General of India hmasa ber C.Rajagopalachari piancham pualin Rashtrapati Bhavan hun hman a ni
4. Nepal-a bus chesualah ramdangmi pahnih tiamin mi 7 an thi.

<><><>

#### SIALKAL RANGE BILL

Vawiin Assembly thutkhawmah Sialkal Range Development Council Bill, 2026 chu Select committee-ah siamthat ngai te siamtha turin House-in a pass.

VC

*Sialkal Range Development Council Bill, 2026 puluttu Chief Minister Pu Lalduhoma chuan he bill in a huamchhungah khaw 6 awmin, 4 chu Saitual district huamchhungah a awm a, 2 dang chu Champhai district-ah a awm a, MLA bial pahnihah a awm ve ve bawk avangin MLA Bial pakhat leh District pakhat hnuaiah awm thei se a duhawm hle a ti a. He bill ah hian sorkar hmasa in draft a lo duan sa tawh chu ringin tlem an tidanglam a ti a, a danglam nasa ber tur chu khaw 6 a VC te member a rin nghal mai leh MLA chairman a awm mai kha ni tawh lovin, member paruk te chu mahni khua theuhah an thlang tawh dawn a, a voter te chu MLA inthlana voter te an ni dawn a, State Election Commission buaipuina hnuaiah an inthlang ang. Elected member 6 an awm ang a, pakhat dang chu sorkarin nominated member a siam ve thung dawn a ti a. Member thlan chhuahte chuan an zing atangin Chief Executive member leh executive member tur pakhat ve ve an thlang ang a, 5 dangte chu member an ni dawn a ni. Mibung chu official headquarter tur a ni a, BDO aia hniam lo secretary ah hman tur tih a ni bawk a ni.*

(BYTE)

*He bill hi member hrang hrangin an sawi ho hnuaiah a puluttu Chief Minister Pu Lalduhoma chuan member ten thil fel lo lai ni-a an sawi te enfiaha siamthat*

*ngaite siamtha turin Select committee-ah refer turin rawtna a siam a, he rawtna hi House chuan lungrual takin a pawm a ni.*

<><><>

**CM**

Chief Minister Pu Lalduhoma'n ramchhung khawpui thenkhat a Mizoram House-ah te Manipur a Zohnahthlak unaute thlen phalsak theih a nih thu a sawi.

Vawiina Assembly thutkhawm neihah Champhai North Bialtu MLA Pu H.Ginzalala zawhna chhangin, GAD changtu Chief Minister Pu Lalduhoma chuan India ram khawpui thenkhata Mizoram House-ah Manipur a Zohnahthlak unaute thlen phalsak theih a nih thu sawiin, Mizoram House-a room luah hawh leh thleng tur chi hrang hrang tarlanna office memorandum-ah Mizoram mite chiah thlen theih tiin a inziak hran lo a ti.

Chief Minister Pu Lalduhoma chuan state danga Mizoram House nei turin Mizoram chuan ram a mamawh hle tih sawi bawkin, building sa turin sum a hautak hle bawk a ti a. Hetihlai hian Railways tih lova India-a ram ngah ber BSNL nen indawrin BSNL ram monetisation scheme hnuaiyah India ram khawpui hrang hranga BSNL ramah te Mizoram House emaw Mizoram tana tangkai tur sa turin inbiakna kalpui mek a ni a ti a, Mizoram sorkar chuan builder an ruai chhawng ang a, a senso an niin an tum ang a, Mizoram sum hmang lovin ram chhung khawpui hrang hrangah te Mizoram House neih thluah an inbeisei tih a sawi a. Kolkata Ballyngunge road-a Mizoram House hralh a ni chu pawin an tih thu sawiin, court-ah an inkhinglet mek tih a sawi bawk a ni.

Byte: Chief Minister Pu Lalduhoma

Hei bakah hian Chief Minister chuan ziaka zawhna chhangin Manipur khawpui pakhat Lamka-a Mizoram House sak tum a nih thu sawiin, "Construction of Mizoram Guest House at Lamka, Manipur" tih project chu PMJVK atanga fund turin Planning & Programme Implementation Department-ah GAD atangin kumin January khan thehluh a ni a, sum sanction erawh a la awm lo tih a tarlang a ni.

<><><>

**ASSEMBLY-BILL**

Vawiin Assembly Legislative thukhawm chuan The Mizoram Shops and Establishments (Regulation of Employment and Conditions of Service) (Amendment) Bill, 2026 chu lungrual takin a pawm a.

He bill puluttu Minister Pu Lalnghinglova Hmar chuan he bill-in a tum ber chu hnathawk tu leh a ruaitute tana awlsamna, a dan an zawm tikhirhtu sukiang tura tih a nih bakah dan bawhchhetute hremna leh dan bawhchhiatna hremna awlsam zawka kalpui dan leh tihchakna a nih thu a sawi a, he bill-ah hian hna thawh hun chhung darkar 8 thleng tih thin chu darkar 10 thleng thawh phalna siamin, inhlawhfate chhawr rim lutuk an nih loh nan chawlhkar khata darkar 58 hnathawh phalsak thin chu darkar 50 thleng thawh phalsak a nih thu a sawi a, member te chu he bill hi pawmpui turin a sawm a, member hrang hrangin an sawi ho hnuah House chuan inlungrual takin a pawm a ni.

<><><>

## ASF COMPENSATION

Kum 2024 chhunga vawk pul hri African Swine Fever (ASF) avanga vawk suatte zangnadawmna chu vawiin atangin semchhuah a ni.

AH & Vety Minister Pu C. Lalsawivungan vawiin khan a office chamber-ah ASF Culling Compensation cheng nuai 89 sing 3 sang 9 chu beneficiary mi 10 hnenah a sem a, Mizoram puma ASF beneficiary-te hnenah pek chhuah tur chu cheng nuai 1559 niin, vawiin vek hian District khawpui tinah ASF Culling Compensation hi sem zui nghal a ni ang.

AH & Vety Minister Pu C. Lalsawivunga chuan, “March 21, 2021-a Lungsen, Lunglei District-a ASF hmuh chhuah a nih atanga vawiin thlengin state economy sawi nghing dawt khawpin ASF avangin kum tin vawk thi leh suat a awm thin a ti a, sorkar laipui thupek angin vawk suatte chauh hi sorkar laipui rate leh norms angin compensation zaa 50 CSS leh SMS hmanga pek theih a ni a ti. Kum 2022-23 leh 2023-24 chhungin compensation atana an sum mamawh zaa 25 chauh an dawn avangin beneficiary-te hnenah zaa 25 pek an ni a. Ran vulhtute hlohna a nasat avangin kum 2024 khan ASF chu Mizoram sorkarin State Disaster-ah puangin, Mizoram chauh hi India ramah State Specific Disaster-a puan a ni. Hemi atan hian ran thi ralna, ran thi pakhat zelah cheng sang 4 beneficiary pakhata vawk 6 chin huamin Mizoram chhungah sem chhuah vek tawh a ni,” a ti.

Pu C. Lalsawivunga chuan kum 2024-a ASF Culling Compensation an dawn tur atangin tuna an hmuh zat hi zaa 63.65 a ni a, a bak hmuh leh tur dang la awm pawh theih tawp chhuahin an bawh zui mek a ni a ti. Kum 2024-a mi tur pawisa hi a semna tur hmun District Officer te hnen thleng vek tawhin, vawiin hian cheque hmang emaw, Direct Beneficiary Transfer hmangin emaw beneficiary-te hnenah pek chhuah tan a ni ang a ti bawk.

*African Swine Fever avanga vawk suatte zangnadawmna hi sorkar laipui chuan rate bitukin, 15kg. hnuai lamah Rs.2,200/-, 15-40kg. inkarah Rs.5,800/-, 70-100kg. inkarah Rs.12,000 niin, 100kg. chin chung lamah Rs.15,000 a ni a. Tukina AH & Vety Minister Office Chamber-a zangnadawmna sem zinga dawng hnem ber Pu Zabiakthara, Hunthar Veng, Aizawl chuan cheng nuai 36 sing 1 sang 2,166 a dawng a ni.*

<><><>

## LAWNGTLAI BORDER

Central Young Lai Association in Lai Autonomous District Council leh Chakma Autonomous District Council ramri ni a an ngaih, Parva-I bul a February 13 a Ramri lung an phun chu a diklo tih vawiin khan Governor hnenah CADC BJP hruaitu pahnih, President Pu Durjya Dhan Chakma leh Vice President Pu Doyal Chandra Dewan ten an thlen.

CADC BJP thuchhuah tarlan danin Ramri lung Central YLA in an phunna chu CADC chhung a ni a, hei hian Lai leh Chakma inkara in unauna thatak awm thin chu a tiderhawng thei a, Ramri chungchang chu Dan hnuai chingfela, a siamfel theitute kutah awmse an ti a ni.

CADC BJP chuan Kum 1972 Pawi-Lakher Regional Council atanga LADC leh CADC a pian hnuah Joint Boundary Verification din niin, khatihlai a CADC a CEM Pu Nilmoni Chakma chu CADC aiawhin a tel an ti a, engmah ramri

chungchangah sawibuai a awmlova, Ramri diktak chu Pawi-Lakher Autonomous Region (Re-Organization) Order 1972 ah Chiang Takin a Inziak tih tarlangin, Survey Height Point 405-na Sanghatuilo Lui chu ramri diktak a nih thu an tarlang a ni.

BJP hruaitute hian Governor chu Ramri diktak tichianga chhuifiah turin an ngen a, Central YLA ten Ramri lung an phun pawh phawi a nih theih nan hmala turin Governor hi an ngen.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

#### **HEALTH CHECK-UP**

National Health Mission, NHM leh Aizawl Municipal Corporation tangkawp in Tuiriala bawlhhlawh paihna hmun, Solid Waste Management System-a thawktu te tan hriselna endik runpui neih a ni a, thawktu 100 chuang te hriselna endik an ni.

He One Day Health Checkup hi Joint Municipal Commissioner Pu Lalremruata Kullai chuan kaihhruaiin Aizawl Day Feb- ni 25 lawmna puala buatsaih a nih thu sawiin Hnathawktu te chu he Health Checkup hi ngaipawimawh a, tangkai taka hmang turin a chah.

NUHM changtu Health Dept Jt Director Dr. Lalawmpuia Chhangte chuan kum engemaw zat chhung NUHM hmalakna in Solid Waste Management Centre-ah hian free Health Checkup neih a nih tawh thu a sawi a, thawktu te chu an hriselna ngaipawimawh turin a chah a ni.

Kan corr report lo ngaithla ang.

*He health Check up ah hian Test chi hrang hrang 13 vel a thlawnin tihsak niin ABHA Health ID siamsak zel an ni a, inentirte hi a thlawn in Damdawi pek an ni. An mamawh ang Vaccine pawh pek nghal vek an ni bawk. Specialist Doctor te, Sihphir UPHC, Zemabawk UPHC, Lawipui UPHC-a Doctor leh Staff te bakah MMU Aizawl East leh Tuirial UHWC a thawktu ten an hriselna hi an endik a, thawktu 100 chuang te hriselna endik a ni.*

<><><>

#### **RAJAJI**

Vawiin Khan India mi zinga Governor General of India hmasa ber C.Rajagopalachari piancham pualin Rashtrapati Bhavan hun hman a ni a. He hunah hian President Droupadi Murmu-i chuan Rajagopalachari-a lim siam tlangzarhin Edwin Lutyens-a lim thlak nan dah a ni a.Vawiin hun hmannaah hian Vice President C P Radhakrishnan, Union Minister J P Nadda, Dr.S Jaishankar, Dharmendra Pradhan, Gajendra Singh Shekhawat, Dr.L Murugan leh C. Rajagopalachari-a chhungte an tel a ni.

Thusawiin President Murmu-i chuan tuna an hmalakna chu hun rei tak ram mipuite rilru luah thin mingo awpbehna rilru paihna pakhat a ni a ti a. Ramchhunga hnam ziarang leh nunphung, tihdan tha leh ram tana mi ropuite chawimawina tura hmalak zel a nih thu a sawi a ni. Pi Murmui chuan C.Rajagopalachari chuan ram chanchinah sulhnu ropui thai reh theih tawh loh tur a hnut chhiah a ti bawk.

<><><>

## NEPAL

Nepal-a bus chesualah ramdangmi pahnih tiamin mi 7 an thi. Thudawn danin vanduaina thlenna hmun hi Charaundi-a Prithvi Highway ah a ni a. Pokhara atanga Kathmandu pana tlan khualzin phur bus hi a chetsual hnuah Trishul luiah a tla a ni. Bus ah hian mi 44 an chuang a. Mi 26 chuan hliam an tuar a. Damdawiin hnaiah kalpui an ni a. Hliam na zualte chu Kathmandu ah lak an ni.

<><><>